

TAITOSI

Poru Gigirum Meuma Taitosi Menan Tenewa

1 ¹Poru, God nauwawa eniwa, sira Iesu Keriso apasoro meuma, God gomiya munne igiyawa anotumat muma oya sira anoano natawa me God namive oraiwa oya, me anegne apasoro ana. ²“God me oma den ane uga wape. Me watavit ampa di inaiinai yaibobot oya agi wane. Me nu anoetewa gumbe God wagomiya nedne. ³Me anonewa kumive, gae mame toyau nunne. God me Waita Abnawa me nau mame atan oya didnedne.

⁴^bNe utunwa Taitosi me anotumat desiroma aunewa gumbe. Mamunwa God ge nu Waita Abnawa numawa Keriso Iesu gumbe, God ano oraiwa ge yum ge gungap.

At Kurete Apa Taitosi Nau Aivi

⁵Ne at Kurete apa kwegemna, kuiyawa me nau numawa onan den anewa ge yai waribiya sira ne genan wana mina, gwetoimu dada danave, ge namuyoiyoi igiyawa te muntan oya. ⁶^cNamuyoiyoi abnawa me iyayapan pui den yuwameme, memawa vesin desirom, mamawa me usitainawa anotumat anoeme, sira usitainawa mu ano kukaeba mumawa oya pui den yuwameme sira mu nawankanu eme igiyawa onan. ⁷Namuyoiyoi kokawa me God nauwawa aivi gumbe, me iyayapan pui den yuwamemewa. Me danawa piri den aigimpe, yoi yusipamitwa koka den naigimpe, mut atan den anoigimpe, anmagawa kukaeba gumbe den autan anoivi. ⁸Megara baigan gumbe iyayapan warinamivi, me oravit anoivi, me mokona aigimpe, ano meuma me oraimina, me inaiinai oraimina God namive, ge membovit amaraivi. ⁹Me gae natawa me toyau waneyawa yaigipamit amaraivi. Kuiyawa gae oraiwa gumbe me watdega mumpu, sira yai mu wat dirumpe epin oraiwa.

^a 1:2 1Ko 1:27 ^b 1:4 Rom 1:7; 2Ko 8:23; Gar 2:3 ^c 1:6-9 1Ti 3:2-7; 2Ti 2:24-26

¹⁰ ^dKuiyawa nu gunup anavi eme igiyawa, gae uga veme igiyawa, iyayapan mu ape iyayapan upeba anopipanum ape igiyawa, obiren wakeya. Mu kwapituitui igiyawa danowo obiren wakeya. ¹¹ ^eMu nouwa tobotpe. Mu imuwo anmagawa kukaeba autan oya dividivi mu den toyau mumpewa dirumeme, sira gwe gwe upeba mu kukai muteme. ¹² Propeta me at muma desirom meib wane, “Kurete igiyawa mu evedni ugauga vemewa sira mae kukaeba, sira nau atan den anoeme megara mu nakwai nabot nabot igiyawa.” ¹³ ^fGae mame natawa di. Meoya, yusipamit wag diruma, meve mu yaimoyai yang anope anotumat gumbe. ¹⁴ ^gJu igiyawa kuinuiyowa natawa onanwa den anope, sira natawa topaiemewa igiyawa gwangwan mumawa den anope. ¹⁵ Danowa iyakaisi igiyawa munan dividivi undag iyakaisi, megara kukaeba eme igiyawa munan ge den anotumat eme igiyawa munan, dividivi undag iyakaisi onan. Kuiyowa ge nibdanowa me kukaine. ¹⁶ ^hMu veme God yang anotu, go mu aninin emewa mu God topai eme. Mu di kukaimusia, sira mu God noiwa den aueme, sira oma den ane dividivi undag oravit atan oya.

God Toyau Toyau Meuma Gumbe Wakeg Aigimta

2 ¹Ge toyau toyau oraiwa gumbe gae diruma. ²Iyai tayawa toyau muna. Mu mumbovit yaimoyai amarape, ayamareme igiyawa wakepe, sira mokona ag anotumat oraiwa ge baigan ge yaimoyai amaraigimtanwa gumbe baina wakepe.

³Ebu desiroma, vesin tayawa gaibu toyau muna, mu God nauwawa eme, meoya mu God gumbe yaimoyai ape, yano den waigimpe, yoi yusipama kokavit den naigimpe, dividivi oraiwa toyau munigimpe. ⁴Mu meib ape ipewa, vesin mataiwa oma ane toyau mumpu, memoutuwa ge usitainowa gumbo baigan atanwa, ⁵^jmokona atanwa, uinantaraki onanwa, gwe danave dividivi undag amaraigimtanwa, baigan gumbe wakeigimtanwa, memoutuwa nouwa autanwa. Meib toyau mumpu. Mu gumbo iyayapan God gaiyawa den yan yawampe.

⁶Gina desiroma, iyayapan mataiwa mu toyau muna, yaimoyai anog amaraigimpe. ⁷^kSira dividivi undag gumbe ge oraiwa a, sira guwaguwawa oraiwa a. Ge toyau toyau geuma gumbe oraiwa ge ebnotu yang anope. ⁸^lGae oraiminawa me iyayapan pui den yupewa ge wa. Meib a ipewa, anavi numawa oma den ane gae kukaeba nu gunup wape, mu ubmam ape.

⁹^mAnkwatave nau eme igiyawa diruma, dividivi undag gumbe kokawa muma nouwa aupe, yang anope oma ape, sira kokawa muma gumbo gae garawa den dirumpe. ¹⁰Sira diruma, ub mu gumbo den ape, natawa di

^d 1:10 1Ti 4:7 ^e 1:11 2Ti 3:5-6; 1Pi 5:2 ^f 1:13 2Ti 4:2 ^g 1:14 1Ti 4:7 ^h 1:16 1Jn 1:6; 2:4 ⁱ 2:3 1Ti 3:11 ^j 2:5 Epe 5:22 ^k 2:7 1Ti 4:12 ^l 2:8 1Pi 2:15 ^m 2:9 1Ti 6:1

wape. Me dividivi undag mu emewa gumbe God Waita Abnawa numawa toyau meuma ben waramtan oya.

¹¹Kuiyawa God ano oraiwa mu waita muniviwa iyayapan undag gumbo uwane. ¹²Me toyau nunnewa, God namive ebnotu onanwa ge piyu mame anoano meuma yankweta. Sira kum gare mokona gumbe, oraivit gumbe, inaiinai oraiwa God namive gumbe wakeigimta. ¹³Sira toyau nunnewa, nu owanowan me waribiya nunnewa amaraigimta. Me natawa meib. God kokawa ge Waita Abnawa numawa Keriso Iesu mu eyawa gumbe matai uwape. ¹⁴Keriso me nunan boanewa me nu kukaeba numa oya sira gwiruwad nuntan oya, sira iyayapan meuma mu oraiwa atan oya anoemewa, me membovit oya wat muintan oya.

¹⁵^PDividivi mame yusiwa kokavitwa gumbe toyau muna, wak diruma ape, sira pui yua. Mu den kwema, ge yan barau gempe.

3 ¹Iyayapan wak diruma, mu amara muniviwa ge yutuwa gaibu igiyawa nouwa aupe. Sira mu nouwa aug oraiwa undag atan anoeme igiyawa ape. ²Sira gae kukaeba iyayapan gumbo den wape, sira mut den ape, yum gumbe wakepe, iyayapan undag gumbo baigan ape. Mu meib atan aigimpe igiyawa ape.

³Watawit nu warago igiyawa mina atu, nouwa den aug anopipanum eme igiyawa mina atu, sira dividivi ano kukaeba ge piyu degadega meuma gumbe ankwatave nau eme igiyawa atu. Danapiri ge anoano numawa me iyayapan upeba mu degadega atan den anoetewa danave wakeete, sira nu topai nuniya igiyawa, sira nu gara topai atu igiyawa. ⁴Megara God waita abnawa numa nonemagawa oraiwa ge baigan iyayapan munan uwane. ⁵Me kumiwa apa, waita nunne. Me divi da oraiwa nu atunewa onan, megara me ano oraiwa meuma oya. Guwawa Iyakaisiyapama gumbe, mataiwa yaitanwa gumbe, mataiwa atanwa gumbe muinne. ⁶Iesu Keriso me Waita Abnawa numa gumbe, God Guwawa Iyakaisiyapama mame nunne gunup noidauwane. ⁷Me Keriso ano oraiwa gumbe nu oraivit atanwa oya, sira inaiinai yaibobot oya anoetewa gumbe nu kwan autanwa igiyawa atan oya. ⁸Gae mame me ano kokavitwa, meoya ne anoeniwa ge gae mame oya yusipamit diruma. Me God gumbe anotumat eme igiyawa mu dividivi oraiwa atan anotan oya. Dividivi mame me oraiwa, sira me iyayapan gumbo waita mumawa.

⁹Megara gae kukaeba, dam yaig onamiyawa, diguragut sira gwangwan gumbo gae gara wa atanwa yankweya. Me iyayapan gumbo waita muma onan, sira natawa onan. ¹⁰Apan da dam meumawa ube ainampewa, koni desirom toyau wana, meve koni duwameba toyau wana,

ⁿ 2:12 1Jn 2:16 ^o 2:14 Eks 19:5; Deu 7:6; Ejk 37:23; Gar 1:4; 1Pi 2:9 ^p 2:15 1Ti 4:12

^q 3:1 Rom 13:1-7; 1Pi 2:13-14 ^r 3:3 1Ko 6:9-11; Epe 2:1-2; 5:8 ^s 3:5 2Ti 1:9; 1br 10:22

^t 3:6 Apa 2:17-18 ^u 3:9 2Ti 2:14,16 ^v 3:10 Mat 18:15-17

ivi ig aoreya aipe. ¹¹Ge yaug anoana apan meiba anokukam abnawa me membo yaug anone me kukaeba, megara kukaeba aigimpewa.

Gae Oieba

¹²^wNe Arutemas go Titikas tetna genan onampe. Me ivi, garawapa ge di nenan onaga. Ne Nikoporis apa waketna. Ne taig kumiwa me apa waketan anoeni. ¹³^xDividivi undag ake Gwangwan toewanewan Jenas go Aporos amdau ampe. Dividivi anoemewa ge tamibarip a. ¹⁴^yDividivi undag evedni anoetewa oya nau oraivit atanwa nu undag mina yaug anotanit di.

¹⁵Undag gunap wakeemewa genan gaun veme. Nu anotumat owanaiwa gumbo gaun numa wag diruma. God ano oraiwa ye undag guniyap wakeigimpe.

^w 3:12 1Ko 4:7-8; Epe 6:21-22 ^x 3:13 Apa 18:24; 1Ko 3:5-6 ^y 3:14 Epe 4:28